

---

**BERTRANS DEL POJET , POGET O PUGET.**

7225.

**BERTRANS DEL POJET** si fo un gentils castellans de Proensa , de Teunes , valenz cavalliers e larcx e bons guerriers. E fes bonas cansos e bons sirventes.

7225-6 , 7614.

**D**E sirventes aurai gran ren perduto ;  
**E** perdrai en encaras un o dos  
**È**ls rics malvatz on pretz es remazutz ,  
**Q**u'à lor no platz donars ni messios ,  
**N**i lor platz res que taingn' à cortesia ,  
**M**as be lor platz quant ajoston l'argen :  
**P**er so mais n'a cel que lo met pus gen ,  
**C**'onors val mais quez avol manentia.

Ja no serai desmentitz ni vencutz  
Qu'anc hom escas no fon aventuros ;  
E se n'i a un qu'en sia cregutz ,  
Donc el n'a fait alcun fac vergonhos.  
Qu'avens no vol solatz ni leugaria ,  
Ni vol trobar home larc ni meten ,  
Ans lo vol tal qu'estei aunidamen  
E tal qu'endur so que manjar deuria.

Que val tesaus qu'ades es rescodutz  
Ni qual pro tenc à nul home qu'anc fos ?  
Aitan n'ai eu , sol no sia mogutz ,  
Com an aquill que'l tenon à rescos.  
Qu'à mi non cost' un denier si s'perdia ,  
Et ill an tot l'esmai e'l pensamen ;  
E quan perdon l'aver perdon lo sen ,  
Et à mi an pro donat de que ria.

Per valens faitz es hom meils mantengutz  
Et aculhit et honratz per los bos ;  
E n'es hom meils desiratz e volgutz ,  
E'n pot menar plus onratz companhos.  
Que malvestatz ab pretz no s'aparia  
Ni s'acordon per lo meu ensien ;  
Que pretz vol dar e metre largamen ,  
E malvestatz estreing e serr' e lia.

Lai à'n Guillem Augier , on pretz s'eslutz ,  
Tramet mon cant , quar il es cabalos ;  
E'ls enemics ten sobratz e vencutz ,  
Et als amics es francs et amoros ,  
Larcs et adregz e senes vilania ;  
E tot quant a don' e met e despen ,  
E non o fai ges ab semblan dolen ;  
Per qu'eu val mais , ja tan pauc non metria.